


ALAHADY - KAREMY 2 - TAONA A



VOAANTSO HO AN'NY FANANTENANA ISIKA

Ry Kristianina havana, ny litorjia dia entin'ny Eglizy hampianatra antsika hivelona ny finoana, izany hoe ny finoana dia ankalazaina amin'ny alalan'ny litorjia. Amin'izao karemy izao dia "ADY sady DIA"

Vakiteny I : Jen. 12, 1-4a
Tononkira : Sal. 32,
Vakiteny II : 2 Tim. 1, 8b-10
Evanjely : Mt. 17, 1-9

mitondra antsika amin'ny Paka, raha miara-maty amin'i Kristy amin'ny fahotana isika dia hiara-hitsangana amin'i Kristy , ADY amin'ny fahotana no iainantsika amin'izao karemy izao mba hiaraka hitsangana amin'i Kristy isika DIA ho an'ny amin'ny Paka fitsanganan-ko velona. Ny litorija fa indrindra ireo vakiteny henontsika dia manampy antsika

amin'izany ADY sy DIA izany mba tsy ho very fanantenana isika. Ry Kristianina havana fantantsika fa mety mafy ny ADY hatrehina, mety tsy zaka ny DIA satria mavesatra. Ambaran'ny litorjia sahady amin'izao Alahady faharoa ny karemy izao fa ny tanjona miandry antsika dia i Kristy nitsangan-ko velona. Fihavaozana no andrasantsika, izany no tena dikany fiovan'i Jesoa tarehy teo an-tendrombohitra. Nasehon'i Jesoa Kristy tamin'ny mpianany izany fiovana tarehy izany satria fantany tokoa fa havesatra ny ADY tsy maintsy hatrehin'ireo mpianatra manoloana ny fijaliany sy ny famantsihana azy amin'ny lakroa ary ny fahafatesany ka hitondra fahakiviana amin'ireo mpianany. Amin'izao Alahady faharoa izao dia tian'ny Eglizy ho feno fanantenana isika, izany no vokatra andrasantsika amin'izao Paka homanintsika izao. Aza adino fa ny Paka izay iainantsika dia ny lohahevitra efa nofidiana ato amin'ny "province ecclesiastique" "i Jesoa mpiara-belona sy mpiara-dalana amintsika". Araka ny henontsika tamin'ny Evanjely dia miara-dàlana amintsika tokoa i Jesoa, tsy Jesoa lavitra i Jesoa izay Andriamanintsika fa Olona velona, tsy lavitra Izy fa miaraka amintsika

mamakivaky an'izao karemy izao ka hitondra amin'izany fanantenana izany dia ny fiovantsika ho tsara, fiovantsika ho soa ao amin'ny fiadanan'i Kristy ilay nitsangan-ko velona izay antenaintsika ary noho izany dia ho voninahitr'Andriamanitra ny fiainantsika.

Tahaka ny niantsoan'Andriamanitra an'i Abrahama ao amin'ny vakiteny voalohany no iantsoan' Andriamanitra isika rehetra. Abrama no anarany teo am-piandohana ao amin'ny vakiteny voalohany, omen'Andriamanitra anarana vaovao izy ka lasa Abrahama izay midika fihavaozana satria nisy dingana vita. Niala tamin'ny tany nisy azy izy ka ho entiny any amin'ny tany nampanantenaina. *"Tamin'izany andro izany, Andriamanitra nanao tamin'i Abrama hoe: "Mialà amin'ny taninao sy amin'ny fianakavianao ary amin'ny tranon-drainao mba ho any amin'ny tany hasehoko anao"*

Izany tokoa, tsy maintsy manao dingana isika, miala amin'ny ratsy ka io no ADY, mandeha amin'ny tany nampanantenaina io no DIA.

Isika olo araiky koa tsy maintsy miezaka miala amin'izao fiainana mamatopatotra antsika vokatry ny fahotana, vokatry ny fiainantsika tsy mahay mametraka an'Andriamanitra eo amin'ny fiainantsika. Mbola tsy mahay miara-belona amin'I Jesoa isika, ka mahatonga antsika misy zavatra maro mamatopatotra ka andevozin'ny fahotana. Izany no iantsoan'ny Eglizy antsika mandritra ny karemy hiala amin'ny fiainana ratsy ireny izay tena ADY fa hiroso amin'ny DIA ho an'ny amin'ny Paka.

Ao amin'ny vakiteny faharoa i Md Paoly mananatra an'ny Timote mba hiombona amin'i Jesoa tokoa, dia izy no hitondra azy amin'ny tena fiainana dia hitondra antsika koa amin'ny tena fiainana, hialantsika amin'ny fahafatesana, fahalovana ka hidirantsika amin'ny fiainam-baovao entin'ny Paka sy ny fitsanganan'i Kristy. Izany no banjinintsika amin'ny Evanjely dia ny Paka, i Kristy niakatra any antendrombohitra niaraka tamin'i Piera sy Jakoba ary Joany ka niova tarehy.

Ry Kristianina havana, miantso antsika i Kristy amin'izao Alahady faharoa ny karemy izao, miantso antsika ny Eglizy mba tsy hirefarefa isika, ka andao re hiaraka amin'i Kristy hampiakatra ny fiainantsika.

EFa mampahatsiaro antsika sahady ny pelerinajy any amin'ny "montagne de français" :

- miara-dàlana amin'i Kristy, izany no dikan'ny làlan'ny hazo fijaliana ataontsika ka anaovantsika ezaka hiala ny herisetra sy ny fanapotohana isankarazany eo amin'ny fiainan'ny fianakaviana, ny fiaraha-monina, ny tanindrazantsika, ny diosezintsika,

- miara belona amin'i Kristy isika na dia mafy aza ny famolahan-tena, miakatra isika tahaka nataon'i Jakoba sy Piera ary Joany nahita an'i Jesoa niova tarehy ka faly izy ireo ary nangataka aza hoe : raha sitrakao ndeha hanao lay telo ny iray ho anao, ny iray ho an'I Moizy, ny iray ho an'I Elia "*"Tompo, mahafinaritra ny mitoetra aty; ka raha sitrakao, andeha hanao lay telo aty, ny iray ho Anao, ny iray ho an'i Môizy, ary ny iray ho an'i Elia"*.

Ry Kristianina havana, hiova ny fontsika raha miara-belona amin'i Jesoa isika satria izy ilay mpiara-belona sy mpiara-dàlana amintsika no loharanon'ny hasoavana rehetra ka hiova ny fiainantsika. Mahafinaritra ary mahafaly ny miara-monina amin'izay mipetraka miaraka amintsika satria hafaliana

sy hazavan'i Kristy no manilo antsika sy fitiavan'i Kristy no manentana antsika ary izany no andrasantsika amin'izao fiomanantsika amin'ny Paka izao.

Inona ary ny lalana hahafahantsika hiova amin'izao ADY sy DIA ataontsika izao, inona no andrasantsika ?

Henontsika tamin'ny Evanjely androany ny nolazain'Andriamanitra mikasika an'i Kristy zanany " *Fa raha mbola niteny izy, dia indro nisy rahona mazava nanarona azy ireo. Ary injao nisy feo avy tamin'io rahona io nanao hoe: "Ity no Zanako malalako, izay sitrako indrindra: henoy lzy"*.

Izany tokoa no lalana hitondra antsika amin'ny tena fihavaozana dia ny hihainoantsika an'i Kristy mpiara-belona amintsika. Mamerimberina matetika isika ny milaza : aoka isika handray sy hamaky ny baiboly satria ao no hahitantsika ny tenin'Andriamanitra ka hodinihantsika satria io no hanilo antsika, aoka isika hivavaka, aoka isika hanompo. Izany no maha Eglizy antsika, Eglizy mivavaka mandray ny tenin'Andriamanitra, mandray ny tenan'i Kristy, izany no Eglizy mivavaka. Izany no mahatonga antsika araka ny sori-dàlana pastôraly eto amin'ny diosezy mandray ny andro Asabotsy ho andron'ny fianakaviana, hiarahana mivavaka amin'i Masina Maria ilay nahay nandray ny tenin'Andriamanitra. Raha mihaino azy Kristy tenin'Andriamanitra isika, izy ilay mpiara-belona amintsika, tadidintsika ny vokatr'izany tao Emaosy ireo mpianatra raha nandray ny tenin'Andriamanitra dia nirehidrehitra ny fony. Amin'izao handinihantsika ny lohahevitra hoe i Jesoa mpiara-dàlana amintsika sy mpiara-belona amintsika, hiaraka hiakatra an-tendrombohitra koa isika ka hiala amin'ireny herisetra sy ny hetraketraka isika amin'ny toerana misy antsika tsirairary avy ka ho "chapelle" olona tokoa isika tsirairay ary hanambara an'izany famindrampon'Andriamanitra izany ka hanatanteraka ny asa fito ara-nofo sy asa fito ara-panahy ary ampiantsika amin'ny fikolokolana ny tontolo iainana, izany no hitondra antsika amin'ny fanantenana, izany no Paka fandalovana ka hitondra fihavaozana tokoa eo amin'ny fiainantsika.

Ry Jesoa tompo ô, niova tarehy teo imason'ireo mpianatrao ianao mba tsy hahakivy azy ireo amin'ny ADY sy DIA mankany amin'ny Paka, tsy maintsy mandalo amin'ny hazo fijaliana, Ampio izahay tsy hiraviravy tàmàna tsy hatahotra fa hahatoky ny fahasovanao ka hararaotinay tokoa izao fotoana izao hiarahanay hiakatra aminao, hampiakatra ny fiainanay izahay ka hiala amin'ny fitiavantena, ny fialonana, ny avonavona izay mahatonga ny herisetra sy ireny fanapotehana maro isankarazany ka hampanjaka kosa ny tena fifankatiavana, hampanjaka ny rariny sy ny hitsiny, izany no dikan'ny fiovana izay tsy maintsy mandalo amin'ny hazo fijaliana, ho fo vaovao no entinay mankalaza ny Paka ka mandalo amin'ny zavatra mamatopatotra anay, mandalo amin'ny fanandevozan'ny fahotana izahay ka hamaly ny antsonao tahaka an'i Abrahama ary hiala amin'ny fiainana tranainy ka hiditra amin'ny fiainam-baovao amin'izao Paka izao, mahatoky ny fahasoavanao sy ny fanampiana izahay. Amen